



23 de abril de 2010. O Fiscal de Medio Ambiente vén de confirmar a ADEGA a **admisión a trámite no xulgado de Primeira Instancia nº 2 de Compostela** da súa denuncia contra José Manuel Alvarez-Campana Gallo, actual presidente de Portos de Galiza, por un posíbel delito de **prevaricación medioambiental** e outro de **prevaricación urbanística** no caso da piscifactoría de Rinlo (Ribadeo) cando era Director Xeral de Calidade e Avaliación Ambiental. Ditar resolucións presuntamente inxustas saltándose a lexislación ambiental e urbanística non pode saír de balde. ADEGA pide aos Sres. Feijóo e Hernández que **cesen fulminantemente** ao imputado.

Sobre estas actuacións, ADEGA quere manifestar:

- 1.- Os feitos remóntanse ao 2005, logo de que o Consello da Xunta de Fraga, con Feijoo de Vicepresidente e estando o goberno en funcións, aprobara unha declaración de impacto ambiental (DIA) para a piscifactoría de Rinlo asinada por Alvarez-Campana, daquela director xeral de Calidade e Avaliación Ambiental.
- 2.-ADEGA limitouse a por en coñecemento da fiscalía os feitos e a documentación dun caso, no que ao noso xuízo, había mais que indicios dun delito de prevaricación.
- 3.- A ubicación da proxectada piscifactoría de Rinlo, no concello de Ribadeo e a carón do LIC As Catedrais, implicaba unha afección significativa sobre ao estado de conservación de habitats prioritarios da Rede Natura 2000. Asemade, existía, como indicou no seu fallo o TSXG ao anular a DIA, a aprobación do proxecto sectorial e a licenza municipal, risco certo de xerar un dano ambiental irreversible.
- 4.- Logo de que ADEGA paralisara as obras, dúas [sentenzas firmes do Tribunal Superior de](#)

Xustiza de Galiza

a consecuencia de senllos recursos contencioso-administrativos presentados por ADEGA, viñeron a demostrar a aprobación ilegal desta instalación por parte da administración. Resulta evidente que as actuacións de ADEGA neste caso, sempre en defensa do territorio e dos espazos naturais, non foron algo caprichoso. A protección do noso patrimonio natural está consagrada na nosa lexislación e é cada vez máis demandada polo conxunto da sociedade galega. Ditar resolucións presuntamente inxustas, incumprindo os preceptos legais que garanten a conservación dos nosos valores naturais, non pode saír de balde. De momento o Sr. Alvarez-Campana terá que pasar polo xulgado a dar contas perante o xuíz das súas actuacións, que a Fiscalía e ADEGA consideramos delictivas.

5.- O vixente Código Penal nos casos de prevaricación ambiental e urbanística castiga a quen teña informado, adopte o acordo ou resolva sobre un asunto inxustamente e a sabendas, polo que neste caso, de terse cometido un delito, o Sr. Alvarez-Campana é o responsábel directo. Da lectura das citadas sentenzas despréndese que a postura de ADEGA evitou danos irreparábeis ao espazo protexido, argumento que deixa sen efecto a excusa do imputado de que non se causou ningún dano. Nen neste asunto nen noutros que comprometen á administración polas actuacións en espazos protexidos, o conselleiro de Medio Ambiente e o de Medio Rural (D.X. de Conservación da Natureza) poden a seguir polo camiño da negación ou do desleixo. Como xa lles dixemos persoalmente teñen que poñerse a “casaca” de protección da natureza.

6.- ADEGA celebra que a Fiscalía Ambiental empece a cumprir decididamente coa súa función de ministerio público e traslade aos xulgados procederes nos que hai argumentos dabondo para seren considerados delictivos. As leis ambientais están para cumprilas, comezando polos propias administracións encargadas de facelas cumprir e respectar.

7.- Este non é un caso illado, e en ADEGA, fronte ao abandono das responsabilidades na defensa do ambiente que competen ás administracións, imos continuar recurrido á vía xudicial para facer efectiva protección medio ambiental consagrada na lexislación. ADEGA non quere xudicializar a protección do ambiente e do territorio, mais con actuacións coma esta, o caso de Barreiros, e outros que de seguro xurdirán en breve, non nos queda outra opción.

8.- Polas actuacións concretas no caso de Rinlo e outros similares que de seguro xurdirán a partires de agora, pedimos aos señores Feijóo e Hernández o cese inmediato do Sr. Alvarez-Campana como responsábel de Portos de Galiza.

Finalmente, facemos un chamado á sociedade galega para que non fiquen calada e saian en defensa do noso territorio do noso patrimonio natural, fronte á impunidade das desfeitas e a complicidade da Xunta.